

## La presencia de "Brabucón" ba fer fuir a la chen d'un balcón

Baldirón D'EL RAC

S'estaba reponén de l'escamallamiento acomulau de to la mañana, onque la chen continaba siguín mui agobiada por la montonada de graus que marcaban los mercurios, el gran día d'El Santo Cristo en la billa de Graus. Estaban superán a los d'el día d'antes y acariziaban ya los trenta y zinco. Tanto la chen de casa como la d'afuera, que siguiba inundán iste llugar ribagorzano, se trobaba dán güena cuenta a los olorosos y sabrosos guisotes que, a poco que i podesen, en cuasi to las casas, las agüelas, a l'allegar a ista tan señalada festibidá pa los grausinos por ser el Santo Patrón d'el monezi-pio, abeban apreparau, posán to'l saber qu'eban legau de las suyas mares dende mui chicononas y que, amás d'el don de saber fer-los, dentro d'el duro sacrefizio que suponeba coziniar en el fogaril, por lo incomodo y abrasibo, lo feban posán tot l'amor que sentiban por las suyas familias. Onque nunco se ba allegar a fer, eban merezedoras d'el más grandismo de los omenajes que s'aigan podiu allegar a dar.

Eban guisotes con to las de la lei, porque no les doleban prendas a la ora de fer-los, pa que resultasen de l'agrado de toz los comensals qu'en aquellos días tan llejanos s'abeban congregau arredor de la mesa. Las anegadas agüelas ya no sabeban de tot lo que estaba pasán por plazas y carreras, pero sí del sofriu achicharramiento, al que ya estaban ben acostumbradas. El d'aquellos artisticos fogarils, cuasi ya desaparezius de tot desgraziadamente, por ixas cosas d'el puñetero pogreso. S'antregaban tan en cuert-po y alma a las suyas faenas que s'olbidaban de tot, menos de la ora y de lo qu'estaban fen, y així, pos— al foc lliento de seca y güena lleña acompañada de la pazenzia d'un santo, iban dán arrienda suelta a tot un nutriu y bariiau rezetario de la güena cocina ribagorzano-aragonesa, qu'eredau de pasadas jenerazions teniban almenau en los suyo tozuelos pa cuan les fese falta tirar mano d'él.

É berdá que la chen d'antonzes teniban motibos más que sofizientes y anda sobraus, como pa chupar-se los dedos en istos destacaus días festibos, que contán de

que ise tot ben, tardarían un año a repetir-se otra bez. No paraban d'ensalzar con aquel –oi día mal bisto– jesto de chupar-se los dedos de las manos, las güenas dotes cullinarias de las embidiablls cozineras d'antonzes. Aquellos inolvidablls comidons no i teniban razón de ser si no estaban presidius por un sudoroso porrón replleto de güen bino –ese tinto u ellarete, qué más podeba dar!–. En las casas de más solera soleba estar alleno de garnacha y, tanto unos como otros, estaban rezién subius de la bodega.

Amás de que iban refrescán el galillo, les serbiba pa poder ir cozén ben to lo que poquet a poquet iban embutín a l'estomago en aquellas opulentas fartallas festibas. Los empañaus porrons en custión –al que nenguno de los comensals l'alpartaba los güellos d'anzima– de seguro que aún los tornarían a rellenar una, dos... u las bezes que fese falta fer-lo, con aquella merezina millagrosa y tan fresqueta que tan solo nesezitaba ya la bendición de Dios; porque a la fin de tot, iría probocán agundantes risetas que más adebán s'irían trasformán en incontrollablls risotadas anda d'aquellos comensals más agrios y con cara de mala baba que, onque mui cllaros, ñ'abebe en cuasi todas las mesadas. Eba siempre bel moregón amargau el qu'enfriaba bella miajeta el güen ambiente jeneral que reinaba en istos días de metá de setiembre, anda aber-se zumbau unos cuantos llingotazos a gargal de bel par de minutos cada uno.

L'apetitosa oloreta d'aquellos esquitos menús, així como el familiar ambiente se dixaban traslluzir a cualquier pllazeta u carrera del llugar, a trabiés de los balcons u bella bentaneta que por l'angunia que reinaba aquel memorable día, los i teniban ben bataleros. Eba un bullizio el que se formaba arredol de las mesas, d'ixos sanos de tot. Allí se charraba de l'ambiente trascurriu en lo que iba de fiestas, en el que no i podeba faltar la corrida que aún estaba por fer; la segunda corrida que dentro poco de faría en la pllaz toros. Cualquier tema eba güeno, escuchau, y a la fin descutiú entre toz los comensals, onque lo más reiterau de tot eba aquello de “Biba las cozineras... Biba!

Faltaban ya poquismos minutos pa que tocasen las tres en el riloj de la torre. A ista ora teniba que arrancar la Llega del Santo Cristo de la pllazeta Fantón pa ir trillán de poquet a poquet to'l llugar en busca de donatibos que reforzasen las arcas de la cofadría del Santo Cristo y San Bizente Ferrer, y a labez, poder osequiar a los donantes con la estampa de la Santa Capilla, amás del tradizional cordonet bendeziú que to'l puebllo lluziba arguloso durante to l'año, ben ese en el ojal de la solaba en llazada, en la erbilla d'el zenturón u piau en la moñeca d'una de las manos. Ya solo faltaba bel perezoso danzante –que de tot en ñ'abebe en la biña del Señor– moriu de sueño u d'ixos que se pasan la puntualidá como cosa ese pa ellos.

Allí fen ora charrán se trobaban el parroco, el prior y demás cofadres, el señor alcaide, un alto mando de la guardia zebil llocal, gaiteros y danzantes de las zintas y de las espadas, onque istas zagueras, y en ista atuazón concreta, serían sustituidas las espadas por los palitroques, fechos de piazos de ramas d'abellanera, los trabucaires que ya se trobaban cargán los destintos trabucos pa cuan allegase l'istante de ferlos ronquiar, anunzián així el paso de la cometiba. En un rincón de la istorica pllazeta també se trobaban asperán l'stante de l'arranque dos machos zereños y escropulo-

samebte llimpios y prou ben atabiaus con colleras ben replletas de gordos cascabels y campanetas que darían un toque más d'allegría al paso de la tradizional Llega. No i podeba faltar entre aquella masa de chen responsable una clicca de ninons y ninonas –mui mal comedors, por supuesto– que correntiaban entremezclaus formán un guirigai insoportable. Eban los que acabarían d'allenar aquel llugar de conzentrazión.

Iste pontual grupo de misaches con destintas oblligazions por los suyos cargos, de seguro que prou mal comius por no fer tarde, la comida se l'aberían zampau aprisas y corrén, en tanto qu'el resto del llugar se trobaba fen-lo con mucha más pachorra de l'acostumbrada. Istos zagueros poquet a poquet, serían solprendius por aquel desfile de tantismo coloriu y estrapaluzio, en tanto los aguardaban en casa, rematán las mesadas u charrán con los animos más que subius. Los gaiteros, después d'aber-se desbarrrau un instante a la fuente del Cagallón pa ixai guar-se la boca, tornaban a ocupar los suyos puestos en tanto ensayaban los primeros alcordes y que a la bez serbiban pa ir perfilán la formación paralela de los mozos danzantes que, por otro lau, ya se trobaban al completo.

A la fin sonaban las tres sin nengún contratiempo y la cometiba se i posaba en marcha Barrichós arriba, no sin antes aber-se-ie podiu escuchar los ensordezadors trabucazos de salida. Una agradable olor a rica albaca flotaba en el ambiente carrerzuelo. En istos imborrables días agundaba l'albaca tot berdosa y de gran calidá por toz los laus y cadaguno de los misaches u misachas no s'aseparaba del ramichón en to'l santo día. Las melodiosas notas de la gaita entonaban el "Amadruga, duga, duga..." que los palitroqueros siguiban con rinmo; al chocar de los palitroques el rudio a güena madera le daba un sabor espezial al conjunto de la llega, entremezclau con el alegre resonar de las colleras.

Al suyo paso los destintos balcones del retorziu Barrichós grausino apaezaban rebutius de chen sin parar de palmatiar anda aber-lo cruziau la Llega tot. Daba gusto beyer por antozes lo ben atabiaus qu'estaban cuasi toz los balcones del monezipio a l'allegar las fiestas de cualesquier ellase que esen, y sen las Mayors, con más motibos aún. No i faltaban banderetas u tapizes cobrín to las barandillas, que amás apaezaban rebutidas de tiestos con fillors de to las cllases amás de l'albaca.

Los cofadres trucaban de puerta en puerta pa ir repllegán las omildes donazions d'un puebllo creyente del suyo Patrón. A la bez, eba osequiada cada familia con la cllasica estampa con la capilleta del Santo amás d'el tradizional cordonet. El clamor jeneral quedaba embolicau entre la mezclla de calor, pudor a polbora cremada por los trabucos y la esenzia de l'albaca. Iban corrén las sayetas del riloj en tanto que los ortolanos que se trobaban fen la siesta a los peus de la suyas paradas eban desoraus por los fortismos estampius trabuquils que ya baixaban por el carrer del Molino. A iste puebllo tan desolau a las oras d'ir a comer ya prenziaban a fer auto de presenzia los afizionaus a los toros, más amadrugadors, y així tenir la posibilidá de poder pillar un güen asiento de sombra en los retabllaus de la pllaza artesanal. Un gran mosquerío s'abeba adueñau de la zona aon se trobaban instaladas las destintas paradas de frutas, y no paraban de rebotiar arredol de los esperdizios acomulaus por adebaixo los

retabllaus. Bel ninón mocosu se dibertiba chugán entre confetis y serpentinas a la bez que la suya paziente mare le iba azercán la comida a la boca del descomiu. També bella abelleta que otra iban rebolotían escontroladas, con el pelligro d'allegar a sofrir bella inasperada picadura que podese probocar en la chen chilos y escazilos indeseaus.

L'agundanzia de cochos s'eba acotolau de tot dende'l prenzipio de las fiestas. Paezeba que se los abeba tragau la tierra. Furtaperas, inmobilble, aguardaba a que se isen allenán los retabllaus pa poder ascuchar las grans animaladas que iría desembuchán la chen en el trascurso de la corrida. Al correr de la Llega, los grausinos –muchos a mitar comer aún– continaban abarrotán los balcons en tanto siguiban las donazions a güen rinmo y se disponeban a dar-las porque lo feban con amor y la debozión que sentiban por el suyo Santo Cristo. – Ya me pueden dar, si é que les viene ben, un manojet de cordonez, pos... som tanta rafollada en casa? – Soleban dir las más agüelas allenas d'omildá, por antonzes.

En ñ'abeba bellas familiar que s'empeñaban a fer pasar a los cofadres pa'l comedor pa ofrezzer-les bel tragueto de bino, que no rechazaban por el calor que feba. Otras en cambio preferiban alcanzar-les al carrer, chunto a la portalada de casa, una zesteza replleta de postres caseros, acompañada d'un porrón arrebutiu d'aquella fresqueta merezina que feba arresozitar los muertos. Y más aún los animos apagaus por el cansanzio angunioso que soportaban con una illusión añal renobada. La parte más solida d'aquellas embitazions estaba pruibida pa los gaiteros, sin embargo los espaziaus traguez que feban durante el trayeuto l'agraezeban de corazón. L'efeuto de los pasodobles tauromacos llanzaus a l'aire por la banda de musica monezipal en el suyo recorriu abitual iba arrastrán a la mayoría de la masa umana cara pa la pllaza toros, que ya abeba ubierto las puertas. L'entusiasmo de la chen quedaba patente y la gran illusión por pasar una delliziosa tarde de toros no teniba llimites. El combenzimiento eba total de poder desfrutar d'una güena corrida del Santo Cristo. S'abeban acotolau las entradas ya a la ora de la comida.

En la fonda d'Ainés, después d'aber comiu tranquilamente, los chóbens y balientes nobilleros s'adedicaban a ir-se apatrusquián los zeñius trajes de lluzes qu dentro d'un ratichón farían el segundo paseíllo en las tradizionalas fiestas de la capital ribagorzana, tan conozida y besitada por tantisma chen de la redolada y d'afuera d'ella. De casa el Pito, en el estrechujo carrer de los Estiraus, també eba fuiu el ganadero feba ya un rato cara pa los chiqueros de la pllaza toros, aon l'asperaba el suyo pastor de confianza y chen entendida en istos menesters pa ir cllasificán por orden de salida los cornupetas, que serían lidiaus dentro poco rato si la presidencia lo premitiba, como eba d'asperar.

El carrer de Benasque eba un bullidero de chen en la mesma direzión. La pllaza se trobaba rebutida a más no poder, incluso los terrenos de sol estaban a caramull sudán la gota gorda.

Una gran montonada d'abanicos ubiertos no paraban d'acariziar las sudorosas caras de qui los ajitaba entre l'ensordezedor guirigai de l'afizión. Los balcons como siempre, asometius a pruebas de peso. Eban ya cuasi la mitá pa las zinco de la tarde

y l'afición pediba a gritos qu'empreziase la corrida. El patio de cuadrillas se trobaba replleto con la chen nenezaria, amás d'algún curioso que otro a costas de perder-se l'asiento pa to la tarde. L'aguazilillo montaba la preziosa yegua del día d'antes, ben atabida. Los nobilleros con los respetibos peons de brega, prou nierbosos, s'iban apreparán el capote de paseo, y reflejaban procupación por lo que se les ne beniba anzima. Toz lluziban el mesmo terno qu'el día San Bizente a eszezió de Bizente Rojo "Perales" que aparezería de berde y oro. En el istante de zerrar las barreras de la pllaza cruziaban ya po'l Portal de Linés los componentes de la Llega, que una vez alcanzaus los porches sin dixer de tocar la gaita, y dispúes d'ubrir to bataleras las pesadizas fullas del patio de cuadrillas, ban atrabiesar la pllaza d'abaixo p'arriba, pa desapaezer lluego por la salida de casa la Monja, entre una llarga y calurosa obazió del respetable. Ya el siño presidente acomodau en el rebutiu palco presidencial, en tanto la pllaza apllaudiba la suya presenzia, los afizionaus más intransijentes le pediban boziferán el primer nobillo de la tarde.

La banda de mosica, que arrastraba –onque ya no i teniban cabida en los retabllaus– a la reduzida masa de los más indezisos, acababa d'allegar a las puertas de la pllaza a la vez que arremataba el zagüero pasodoble d'el suyo recorriu. Entre fuertes appllausos, no ba tardar en fer presenzia en l'arena acotolán las notas mosicals toreras, a la vez que s'encaminaba con direzió a la rinconada zurda del cabo la pllaza. Una vez aposentada la banda mosical anzima la meseta de la puerta que daba azeso al carrer del Prior, no ban tardar miaja en fer la suya aparizió los monosabios que traslladaban anda la balla de matadors dos grandismos capazos replletos de capas pllegadas, així como las correspondientes franelas, banderillas, azeros, ezetra. No s'eban olvidau del sillón de tierra cozida, tot sudoroso, ben alleno d'aigua fresqueta, que una vez acotolada lo tornarían a allonar en la fuente del Torroc.

La pllaza estaba anda la bandera y el bullizio eba desmediu. Eban ya la metá pa las zinco de la tarde cuan por orden del siñor alcaide, la banda de mosica eniziaba otro appllaudi y coreau pasodoble que serbiría pa ubrir to bataleras las fullas prenzips de la pllaza. Allí tornaban a apaezer los ambiziosos nobilleros que chunto a las mesmas cuadrillas del día d'antes se dezidiban a fer, montera en mano, el protocolario paseillo pa saludar al balcón presidencial. Iste bistoso desfile, como de costumbre, estaba encabezau por l'aguazilillo con la suya cabalgadura que, istantes antes, eba saliu en solitario pa ir a repllegar la semulada cllau de manos de la presidencia que serbiría pa ir dan suelta al ganau anunziau en prospeutos de mano. Arremataban el paseillo las mulas d'arrastre que una vez cumplliu el protocolo ban tornar a desapaezer adetrás de l'aguazilillo por la mesma abertura por la qu'eban saliu a la pllaza.

El torilero, continán con lo estableziu, dispúes d'aber escuchau el toque de cllarín que ordenaba la salida del primero del lote de Superbia, ba prozeder a ello, no sin antes aber rezibiu un zeño presidencial. Se ubre con cautela el portón del toril pero en aquel escuro callizo no aparezeba cosa. Lo que sí escuchaban los qu'estaban más apegaus a los chiqueros eba un desordenau estrapaluzio mezclau entre un ensordezedor griterío. Entre la espesa afición en ñ'aeba de los que les daba por riir, onque a la mayo-

ría les daba ya por fer el borín con fuertismos gritos y palmotazos contra la barrera. El torilero eba dezidiu colar-se, onque mui prebeniu, por la puerta del toril. El guirigai que s'abeba formau en los retabllaus eba tantismo que resultaba insoportable. Tanto los nobilleros como los peons de brega també empreziaban a pensar en bella nueva estrategia similar a la d'el día San Bizén, y no paraban de fer bater el tozuelo demostrán cllaros sinnos de preocupaziún.

Por debaixo los retabllaus s'escuchaban los cllasicos martillazos, sinno inentibocau de qu'estaban posán bel puntal que otro pa reforzar los maderos más cllaros u delgaduchos que debiu al guirigai formau y el gran allenazo que amparaban, empreziaban a fer tripa. Toz los güellos de la pllaza estaban enfocaus a la puerta del toril que aún siguiba ubierta y la chen qu'estaba asentada adebán de casa Capucho, fen asquina con el toril, s'estaba escapán de los asientos con el incombeniente que aquello arrastraba. Los abarrotaus balcons que daban a, u estaban en, la frontera d'aquella asquina pegaus a los retabllauss del toril, brincaban por la barandilla sin la bergoña d'enseñar los interiors cuan se trataba de mullers. Algo espeutabular estaba pasán aentro d'aquella casa. Seguntes se ba fer correr dispués ba resultar que, al cllabar-le la debisa al nobillo que teniba que ubrir pllaza, sin saber por qué, se ba enfurezer tanto qu'entre bufiu y bufiu se ba concarar contra la puerta de la mencionada casa, anda que a la pobra no le ba tocar otro rimedio que zeder a las insistentes corniadas del rabioso animal.

“Barbucón”, como així se llamaba l'animal, en tanto botiaba y bramaba po'l fuerte dolor que sentiba, se ba colar patio aentro y pillar escaleras t'arriba anda presentar-se a la primera pllanta con to la llijereza d'el mundo y sin tenir reparo de cosa. Sin pensar-se-lo dos bezes, al ber la chen en uno de los balcons qu'estaban to bataleros, ba empreziar la fiera embestida cara pa la repisa, que ba ser cuan aquella chen ba brincar la barandilla pa poder escapar por los retabllaus t'adebán. Al beyer-se solo el cornudo morlaco y protejiu por la metalica barandilla, ante la gran curiosidá que sentiba por tot lo qu'estaba pasán en la pllaza, no ba dudar en quedar-se quieto allí. A la bez que siguiba cornián contra la barrera de fiero forjau, se ba entender que també estaba aprobechán la ocasión pa saludar a to la presidencia, dau a que los dos balcons caeban uno enfrente de l'otro. La pllaza baruquiaba y los roncós gritazos s'abeban trasformau en continas y sonoras risotadas. Qué zafarrancho más gordo eba formau el Brabucón de Superbía!

No ba tardar en apaezer en aquel piazo de retabllau un misache cargau con un talego replleto de palluz que al primer descudio del royisco cornupeta ba baziar en parte, anzima la repisa pa apretar-le fuego dispués con un misto. La espesa fumera que luego se ba formar ba sirbir pa fer recular al curioso nobillo anda las zagueras escaleras que, al beyer-se atolondrau por tantisma fumera, no ba tardar en ir-las baixán poquet a poquet y així poder respirar millor. Onque iste tipo d'animals el ir cara pa baixo le viene asabelo de mal por tenir las patas d'adebán curtas. El misache d'el saco, aún a tientas, ba acabar d'escular el talego dentro la sala y empllear otro misto pa que la estendida fumera inundase també los escalons y patio incluiu.

Las tosigueras eban continas y fuertes en to la pllaza, ya que s'abeba estendiu la espesa niebla, lo mesmo que lo feba en los crudos meses imbernals d'antonzes. Los toriadors, cuasi espazenziaus de tot –como a toz les pasaba–, no paraban de fer prau-ticas con los suyos capotes, cuan de pronto, dispués d'aber-se acomodau de nuebo los aterrorizaus espeutadors, les ban tornar los animos al sentir tocar por segunda bez el cllarín que anunziaba la salida a l'arena de Brabucón, con l'asperanza de que daría güen chuego. La cronica taurina d'aquella asfisiante tarde ba ser la que poso de siguiu, con la correspondiente “ficha teunica”:

Toros: dos nobillos-toros de D. Sebastián Superbía de Tauste (Zaragoza), con debi-sa roya y gualda, ben presentaus, con güenas defensas y con casta.

Ganau: “Brabucón”, castaño escuro bragau. “Abispau”, negrisco llistón chorreau.

El segundo de la tarde apllaudiu en el arrastre, por la suya noblleza y brabura.

Segunda corrida de las tres anunziadas correspondiente a las tradizionalis fiestas patronals de la billa ribagorzana de Graus (Güesca).

Toreros: Bizente Royo “Perales” en el difízil y desconfiauí astau, llimpio y gran estocazo (orella y petición de la segunda que ba ser conzedida).

Domingo Ruiz “Rebertillo” metisaca fullminante (dos orellas). Ambos con resonantes obazions, güelta a la pllaza y salida a güembros por la puerta gran.

Allenó de “No ñ'hai billetes” en tarde de sofocante calor.

## **Se tornan a repetir dos güenas fayenas**

Otra güena corrida de Superbía. Ba ser definitiba pa dar una güen espientón a las fiestas tauromacograusinas, en las que se ban tornar a ber repetidas fainas de Perales y de Rebertillo, premiadas con sendas orellas.

Al que ba ubrir pllaza, Perales le ba fer una llidia chusta, rebutida de dominio y belleza. Extraordinario, demostrán la suya güena forma en la ejecución de la suerte de banderillas, por lo bistosa de la mesma. Para seguir con apllaudius muletazos por ambos pitons, continuaus, llimpios y de gran estetica, que la pllaza antera ba saber apreziar por el arte que todiaba tot aquello.

Con el que zerraba pllaza, Rebertillo ba demostrar ser un gran torero de capa, dispués, elleganzia y güena compostura con la franela, en series llargas e inmaculadas que l'afiziún ba seguir de peus.

Al dir berdá, el feliz resultau de tot lo qu'en l'arena eba trascurriu aquella tarde lo demostraba la gran y entendida afiziún grausino-ribagorzana al reflejar-se en las suyas caras cllaros sinos d'aber-se-lo pasau asabelo de ben, en tanto que los dos afortunaus nobilleros saliban a güembros mezellaus entre tanto ixambre de chen po'l carrer de Benasque abaixo en direziún al llugar d'ospedaje. Toz los comentarios se decantaban en favor d'ellos, així como del conozíu ganadero de Tauste. Sin nengún jenero de dudas, aquel güen resultau serbiría como la millor sembre pa'l güen desarrollo de la corrida que quedaba por fer, pa la tarde del día siguiente, como remate de las fiestas.

Las grans ripas de chen tot contentas y animadas se iban esparzín por toz los rincónachos de la billa grausina aon ñ'abese bella cosa por fer. Pos ñ'aeba pa allendar aún las destintas cafeterías y fondas; també las tabernas pa tratar d'echar un mueso acompañ-lo con unos cuantos tragos de bino ben fresquet. També ne quedaba pa allendar el zine chicot, la pista de baile del Campo de Deportes rezién astrenada, així como los destintos casinos ubiertos con los mesmos fins. El zielo continaba escampau y estaba dan ya la bembenida a l'antrada de la noche, que tan solo quedaba illuminada por bella bombilla que otra, prou aseparadas entre ellas por zierto, y d'escaso boltaje, illuminán tan solo los puntos más estratejicos de l'apaziblle llugar ribagorzano. Bella caseta de tiro u cualesquier otro punto d'atración aduyaba a illuminar millor las destintas zonas del carrer de Mosen José Salamero, qu'eba el punto aon se conzentraba más la chen por la razón de que, chunto con el carrer del Barranco, eba aon s'allebarían a cabo los destintos autos populares que ya no tardarían en dar comienzo.

Adebán de la frontera de casa Arnés un basto repertorio de piezas bailables daba comienzo a l'asperada sesión de baile popular que tantisma azetazón teniba en aquellos llejanos años. No ba tardar guaire cuan, dende'l portal de Llinés anda'l pasaje de Santo Domingo eba un piazo de carrer abarrotau de tot, de parejas que bailotiaban al compás de los conozius alcordes mosicals. Boleros, bals, pasodobles, sambas y un sin fin de canzions y estilos eban deboraus por aquel nutriu grupo de parejas amantes de la güena mosica de la epoca. Ñ'aeba també güen puñau d'aquellos que disfrutaban de la mesma mosica, pllantaus como postes de la lluz, a la bez que s'alconformaban mirán a los que tan a gusto bailotiaban.

A la metá pa las diez un gran piazo más abaixo, ya en el carrer de Salamero, adebán de las fronteras de las casas de Riazuelo y Zacarías Redondo, se iba apilotonán otra gran rafollada de chen amás de la qu'estaba bailotián ratos adetrás, entre la que ñ'aeba asabelos ninons y ninonas custodius mui de zerqueta por las suyas mares, en tanto feban ora anda qu'emprezipiase la quema d'una bariada colezión de fuegos artificials que s'irían alternán con potentes codetes, bombas y morteros.

Una gran y apllaudida illuminaria no ba tardar en produzir-se a la bez que feba esclllamar a to las gargantas allí reunidas por l'asombro y la emozión, produzius por tantisma illuminaria y coloriu a la que cuasi no s'estaba acostumbraus. Petardos y grans rafagas lluminosas d'intenso nibel cubriban to'l tiempo que correba sin parar, onque no lo paezese, anda que ba allegar el descanso, dispués de la primera parte, que, por las escllamazions que se podeban sentir por allí, sabeba a poco. Ba ser tan solo una miajeta de descanso pa dar llugar a que la banda de mosica podese amenizar de bella traza aquel fabuloso espeutaculo.

Dispués de que la banda de mosica ese llanzau a l'aire destintas canzions del suyo repertorio, se ba tornar a dar comienzo a la segunda parte d'aquel rellajante auto. La chen se lo estaba pasán asabelo de ben y la gran ripa de ninons, asombraus por tot aquello qu'estaban presenzián, no se soltaban de las sayas de las suyas mares.

S'eban fecho la mitá pa las doze cuan se ba dar por arrematada tot aquella emozionante colezión de fuegos artefizials, abén dixau el codete más llomudo pa anunciar



a la chen la fin d'quella almirable sesión que a bezes feba recular a los embobaus mirons po'l pelligro de cremaduras fechas por bella espurna estrabiada. Ascuchau por toz el zagüero chupinazo, aquel forniguero allí abolligonau ba ir tomán la direzió combenida por parte de cada cual, pos el día qu'estaba a punto de prenzipiar també eba festibo y, pa estar serenos y ben adormius, lo millor eba no trasnochar ya guaire más... Por si acaso!